

PENERANGAN Y.A.B. DATO' SERI DR. MAHATHIR BIN MOHAMAD,
PERDANA MENTERI MERANGKAP MENTERI DALAM NEGERI DI
PARLIMEN PADA 4 JULAI 1989 MENGENAI KONSPIRASI
MENGGULINGKAN KETUA MENTERI SARAWAK SECARA KEKERASAN

Dep. YB Muzni Juma

Tuan Yang di Pertua,

Isu tentang penahanan beberapa orang dari Negeri Sarawak di bawah Akta Keselamatan Dalam Negeri, 1960 baru-baru ini telah dibangkitkan dalam persidangan Dewan pada kali ini. Sehubungan dengan ini, saya sukalah mengambil peluang ini untuk menjelaskan tentang peristiwa yang membawa kepada penahanan orang-orang yang terlibat di bawah Akta Keselamatan Dalam Negeri. Tangkapan dan penahanan mereka telah dibuat berikutan dengan adanya satu konspirasi untuk menggulingkan Y.A.B. Ketua Menteri Sarawak secara kekerasan dan di luar lunas-lunas Perlembagaan.

2. Konspirasi tersebut yang pada mulanya berpunca dari perselisihan peribadi antara pemimpin-pemimpin utama politik Sarawak, telah kemudiannya membabitkan beberapa tokoh lain. Pergolakan yang membawa kepada persengketaan politik ini telah menjadi hangat dengan wujudnya satu rancangan untuk mengusulkan undi tidak percaya terhadap Y.A.B. Datuk Patinggi Haji Abdul Taib bin Mahmud sebagai Ketua Menteri di Dewan Undangan Negeri Sarawak.

Dalam hal ini melalui apa yang digelar "Peristiwa Ming Court Kuala Lumpur", pada 9 MAR 87 sekumpulan 27 orang Ahli Dewan Undangan Negeri Sarawak telah membuat kenyataan di atas nama "Kumpulan Bersatu" bahawa mereka telah hilang kepercayaan kepada Y.A.B. Datuk Patinggi Haji Abdul Taib bin Mahmud. Walaubagaimana pun rancangan mereka tidak berhasil apabila Dewan Undangan Negeri Sarawak dibubarkan pada 10 MAR 87 dan pilihanraya Negeri diadakan pada 15 dan 16 MAR 87. Sebagaimana Ahli-Ahli Yang Berhormat sedia maklum, dalam pilihanraya tersebut Barisan Nasional telah memenangi 28 dari 48 kerusi Dewan Undangan Negeri yang dipertandingkan. Kumpulan Bersatu pula yang ketika itu telah dikenali sebagai Kumpulan MAJU memenangi 20 kerusi iaitu 15 oleh calon Parti Bangsa Dayak Sarawak (PBDS) dan 5 lagi oleh calon Persatuan Rakyat Malaysia Sarawak atau PERMAS.

3. Selain daripada menggunakan landasan politik rancangan untuk mencetuskan keadaan huru hara dan kacau bilau di Sarawak juga dilaksanakan. Satu kumpulan yang dikenali sebagai "Kumpulan Berani Mati" atau "Suicide Squad" telah ditugaskan untuk melakukan pembakaran, letupan bom, dan beberapa tindakan pengkhianatan. Kumpulan ini dianggotai oleh beberapa orang dari suku kaum Iban tetapi pendalangnya adalah tokoh-tokoh PERMAS dari suku kaum Melayu/Malanau. Ekorannya antara 6 APR 87 hingga 5 MEI 87 sebanyak lapan (8) insiden telah dicituskan di Serian dan Kuching.

4. Bagi memastikan ketenteraman awam dan keselamatan dalam negeri Sarawak terpelihara, pihak Polis telah melancarkan satu operasi di antara 8 MEI 87 hingga 24 MEI 87 dan menangkap seramai 16 orang yang disyakki terlibat. Tindakan tersebut telah dapat meredakan suasana seketika.

5. Sungguhpun pada zahirnya keadaan pada ketika itu telah dapat diredakan tetapi penentangan dan rasa tidak puas hati pemimpin-pemimpin Melayu, khususnya tokoh-tokoh utama PERMAS dan Persatuan Melayu Sarawak atau PMS, terus berlaku. Mereka menganggap Y.A.B. Datuk Patinggi Haji Abdul Taib bin Mahmud mengamalkan 'nepotism', pendendam dan mementingkan kaum Malanau serta terlalu memberi muka kepada kaum Cina. Sementara orang-orang Melayu pula, menurut mereka, ditindas. Tokoh-tokoh tersebut telah menubuhkan satu "Task Force" sebaik sahaja Pilihanraya Negeri APR 87 selesai untuk merancang dan menyelaras langkah-langkah bagi menentang Kerajaan Negeri Sarawak. Satu pakatan sulit bagi melaksanakan rancangan menggulingkan Y.A.B. Datuk Patinggi Haji Abdul Taib bin Mahmud sebagai Ketua Menteri Sarawak, secara kekerasan telah diwujudkan.

6. Dalam perjumpaan yang diadakan oleh pakatan sulit tersebut pada bulan JUN/JUL 87, persetujuan telah dibuat untuk

membahagi-bahagikan tugas-tugas yang perlu dilaksanakan dikalangan anggota-anggota pakatan itu termasuklah mendapatkan bahan letupan dan senjata. Seterusnya pakatan sulit ini telah membuat rancangan tindakan-tindakan berikut:-

- a) Menimbulkan suasana kebencian orang ramai, khususnya orang-orang melayu, terhadap kepimpinan Y.A.B. Datuk Patinggi Haji Abdul Taib bin Mahmud melalui penyebaran risalah-risalah dan surat-surat layang yang menonjolkan apa yang dikatakan kelemahan-kelemahan pentadbiran Kerajaan Negeri Sarawak dan perkara-perkara yang boleh membakar semangat perkauman Melayu - Cina.
- b) Melakukan insiden-insiden pembakaran di sekitar Bandaraya Kuching menjelang perayaan ulangtahun Ke 25 Kemerdekaan Sarawak dalam Malaysia.
- c) Melakukan insiden-insiden pengeboman terhadap sasaran-sasaran penting dan strategik di sekitar Bandaraya Kuching menjelang perayaan ulangtahun Ke 25 Kemerdekaan Sarawak dalam Malaysia.

- d) Membunuh Y.A.B. Datuk Patinggi Haji Abdul Taib bin Mahmud secepat mungkin pada waktu yang sesuai dengan cara meletupkan kereta yang dinaikinya atau mengebom rumah beliau dengan menggunakan kapal terbang mainan kawalan jarak jauh (remote control toy plane) atau menembak beliau.

7. Bagi mencapai tujuan tersebut, anggota-anggota pakatan sulit ini telah membuat tinjauan dan mengenal pasti beberapa sasaran penting dan strategik di sekitar Bandaraya Kuching. Ini termasuklah jambatan gantung Jalan Satok, jambatan Santubong dan Bangunan Civic Centre, Kuching. Mereka juga telah mengumpulkan bahan-bahan letupan seperti bom tangan, "plastic explosives" dan "dynamite" disamping mendapatkan beberapa pucuk senjata api berupa pistol dan Self Loading Rifle (SLR). Dalam hal ini, sepucuk revolver .38 Smith & Wesson, sepucuk pistol automatic .22 dan selaras Weatherby automatic shotgun dan sejumlah yang agak besar peluru-peluru berbagai jenis yang telah dimiliki secara haram juga dijumpai.

8. Di antara 28 APR 88 hingga 7 JUN 88, sebanyak 25 insiden kebakaran telah dilakukan yang melibatkan bangunan-bangunan Kerajaan dan swasta termasuklah bangunan-bangunan komersial, rumah kediaman, gudang, hotel dan tempat-tempat hiburan awam di sekitar Bandaraya Kuching.

Tuan Yang di Pertua,

9. Memandangkan keadaan tegang yang wujud ketika itu, pihak Polis telah bertindak tegas dengan melancarkan satu operasi tangkapan yang dimulakan pada 23 JUN 88 hingga 20 SEP 88. Dalam gerakan tersebut seramai sebelas orang telah ditangkap dan ditahan di bawah Seksyen 73(1) Akta Keselamatan Dalam Negeri, 1960.

10. Tindakan tegas pihak Polis itu telah berjaya bukan sahaja membendung dari merebaknya kegiatan-kegiatan keganasan seperti yang telah dirancang oleh pakatan sulit tersebut malahan, telah berjaya meredakan keadaan ketegangan dikalangan masyarakat tempatan. Keadaan cemas dan huru hara yang hendak diwujudkan oleh kumpulan ini telah dapat diredakan. Dengan itu juga ianya telah dapat mengelakkan kerosakan-kerosakan harta benda serta kemungkinan besar kehilangan nyawa orang-orang awam yang tidak berdosa.

Tuan Yang di Pertua,

11. Hasil dari siasatan pihak Polis terhadap orang-orang yang ditangkap itu sesungguhnya mendedahkan matlamat dan tujuan pakatan sulit tersebut seperti yang telah saya terangkan tadi. Siasatan Polis juga menunjukkan betapa bersungguhnyanya anggota-anggota kumpulan ini dalam melaksanakan rancangan-rancangan mereka.

12. Daripada sebelas orang yang ditangkap, sembilan orang telah dikenakan Perintah Tahanan di bawah Seksyen 8(1) Akta Keselamatan Dalam Negeri, sementara dua orang yang lainnya telah dibebaskan tanpa syarat. Dua daripada sembilan orang dikenakan Perintah Tahanan itu telahpun kemudiannya dibebaskan di bawah Penggantungan Perintah Tahanan (Suspended Order of Detention).

Tuan Yang di Pertua,

13. Saya ingin mengambil kesempatan di Dewan yang mulia ini untuk menegaskan sekali lagi bahawa Kerajaan tidak akan teragak-agak untuk bertindak mengikut lunas undang-undang terhadap sesiapa sahaja yang melakukan kegiatan-kegiatan dan tindakan-tindakan yang boleh mengganggu gugat ketenteraman awam dan

keselamatan negara, lebih-lebih lagi kegiatan-kegiatan dan tindakan-tindakan kekerasan di luar Perlembagaan, demi mengekalkan suasana keamanan dan kestabilan negara.

Tuan Yang di Pertua,

14. Hasil dari langkah-langkah tegas yang telah diambil oleh Kerajaan selama ini, telah dapat memulihkan dan memelihara suasana keharmonian dan kestabilan dalam negara. Suasana ini adalah amat penting untuk membolehkan Kerajaan Pusat dan Kerajaan-Kerajaan Negeri meneruskan usaha-usaha ke arah meninggikan taraf hidup rakyat jelata berjalan dengan lancar. Bagi Negeri Sarawak khususnya, berikutan dari langkah-langkah tegas yang telah diambil oleh Kerajaan berhubung dengan konspirasi sepertimana yang telah saya huraikan maka suasana di Sarawak sekarang ini telah pun pulih seperti sediakala.

AR/wri.